



Área de Xustiza Social e Coidados
Servizo de Educación

📁 236/2017/54 📄 23611I00B3

CONVENIO PARA PROMOVER O INCREMENTO PROGRESIVO DA OFERTA DE
PRAZAS PUBLICAS NO PRIMEIRO CICLO DE ESCOLAS INFANTIS ANO 2017
IMPORTE 187.646,56€

REUNIDOS

Por unha banda, D.Xulio Ferreiro Baamonde, alcalde do Concello da Coruña, en representación do Concello da Coruña, con NIF 1503000J e domicilio para os efectos de notificación na praza de María Pita, 1, 15001, A Coruña.

Por outra banda, D. Eduardo Aceña García, en calidade de presidente da Institución Benéfico Social Padre Rubinos, con NIF G15074743, y domicilio fiscal en ronda de Outeiro, nº325, 15011, A Coruña.

Ambas partes recoñécense recíprocamente a capacidade legal dabondo e precisa para outorgaren o presente convenio e para tal fin,

EXPOÑEN

PRIMEIRO.- Que a Institución Benéfico Social Padre Rubinos (en adiante Institución) é unha asociación de fins benéfico-sociais e asistenciais sen ánimo de lucro, que ten como fins estatutarios propios o servizo de guardería infantil, entre outros análogos de servizo social á comunidade.

SEGUNDO.- No marco das súas actividades, promoveu a construción dunha escola infantil que se puxo en funcionamento en setembro de 2014 (curso escolar 2014-2015), a través da cal se ofertaron 95 prazas de primeiro ciclo de educación infantil.

TERCEIRO.- Que o Concello da Coruña entende que a actividade de prestación do servizo de educación infantil de primeiro ciclo é de interese xeral para o conxunto da cidade e, en consecuencia, o orzamento municipal do exercicio 2017 recolle unha subvención a nome de esta entidade por un importe de 187.646,56€, coa finalidade de financiar as prazas escolares xestionadas pola Institución.

Que o Concello pretende a través do presente convenio fomentar o aumento de prazas educativas na cidade, ao abeiro do deber establecido con carácter xeral para tódalas administración públicas de promover o incremento progresivo da oferta de prazas públicas no primeiro ciclo de educación infantil recollido no artigo 15 da lei orgánica 2/2006, de Educación.

Que tendo en conta que o Concello vai a subvencionar as prazas do primeiro ciclo de infantil da escola María del Carmen Cervigón a través dos créditos consignados na aplicación 51 323 48950 débesele exixir á institución o sometemento da escola ao regulamento de organización e funcionamento das escolas integradas na rede de escolas infantís municipais (REIM en adiante).

CUARTO.- A lei 38/2003, xeral de subvencións (LXS en adiante), no seu artigo 2.1, entende por subvención toda disposición monetaria realizada polas administración públicas a favor de persoas públicas o privadas e que cumpra os seguintes requisitos: que a entrega se realice sen contraprestación directa dos beneficiarios, que a entrega



Área de Xustiza Social e Coidados Servizo de Educación

📁 236/2017/54 📄 23611I00B3

esteá suxeita ao cumprimento dun determinado obxectivo, á realización dunha actividade, debendo o beneficiario cumprir as obrigas materiais e formais que se estableceran e que o proxecto financiado teña por obxecto o fomento dunha actividade de utilidade pública ou de interese social ou de promoción dunha finalidade pública.

QUINTO.- Do mesmo xeito, a LXS no seu artigo 22.2 dispón que poderán concederse de xeito directo as subvencións recollidas nominativamente nos orzamentos, nos termos establecidos nos convenios e na normativa reguladora destas subvencións, e no artigo 28 establece que os convenios serán o instrumento habitual para canalizar estas subvencións.

SEXTO.- A Institución presentou a documentación precisa para para a tramitación do expediente no Rexistro Xeral do Concello o día 05.06.2017.

SÉTIMO.- Unha vez comprobado o cumprimento dos requisitos establecidos na normativa reguladora de subvencións, e, sobre a base do exposto, as dúas partes acordan subscribiren o presente convenio, dacordo cas seguintes.

CLÁUSULAS

PRIMEIRA .- OBXECTO DO CONVENIO

O obxecto do presente convenio é establecer as bases de colaboración entre o Concello da Coruña e a Institución Benéfico Social Padre Rubinos, coa finalidade de contribuir a financiar as 95 prazas do primeiro ciclo de educación infantil que a Institución oferte a través da escola infantil “María del Carmen Cervigón”, durante o exercicio 2017.

SEGUNDA.- OBRIGAS DAS PARTES

O Concello comprométese a achegar como máximo, durante 2017, a cantidade de 187.646,56€, con cargo á aplicación orzamentaria 51 323 489 50.

A Institución comprométese a que a escola infantil Maria del Carmen Cervigón se someta ás determinacións contidas no regulamento de organización, funcionamento e réxime xurídico das escolas integradas na REIM, coas excepcións que se indican máis adiante.

TERCEIRA.- FINANCIAMENTO DAS ACTIVIDADES

- A. Establecese coma requisito mínimo ou condición de financiamento pola cantidade máxima indicada, que se cubrirán, como mínimo 80 das 95 prazas ofertadas. No suposto de que este requisito non se cumpra, o importe da subvención será reducido proporcionalmente, detraéndose ou reintegándose a parte proporcional da subvención.
- B. En relación co artigo 32 do Regulamento da LXS enténdese a achega municipal coma un importe certo sen referencia a unha porcentaxe ou fracción do custo total e que, en consecuencia, queda a conta do beneficiario a diferenza de financiamento precisa para a total execución da actividade subvencionada. Porén, a actividade financiarase coa achega municipal



Área de Xustiza Social e Coidados Servizo de Educación

📁 236/2017/54 📄 23611I00B3

estabelecida na cláusula segunda do convenio e coas tarifas aboadas pola prestación do servizo de escola infantil, que terán a natureza de financiación afectada á actividade.

- C. Se o custo total da actividade é inferior ao importe do financiamento público, procederá o reintegro deste polo importe que rebase o custo total da actividade, dacordo co artigo 32.2 do regulamento da LXS aprobado polo real decreto 887/2006, do 21 de xullo(en adiante RLXS).
- D. Esta subvención será compatíbel con outras subvencións, axudas, ingresos ou recursos para a mesma finalidade, procedentes de calquera administración ou ente público ou privado (mesmo que sexa este Concello), sempre que non se supere o custo da actividade subvencionada, sen prexuízo do que puidera establecer a normativa reguladora de ditas subvencións ou axudas.
- E. Consonte o disposto no artigo 34 do RLXS, sendo compatible dita achega con outras subvencións, no caso de que se produza exceso de subvencións percibidas de distintas entidades públicas ao respecto do custo total da actividade e fosen compatíbeis entre si, o beneficiario deberá reintegrar o exceso a favor das entidades concedentes en proporción ás subvención concedidas por cada unha delas. No caso de que o Concello advirta o exceso de financiamento esixirá o reintegro polo importe total do exceso até o límite da subvención aboada en virtude deste convenio.
- F. A achega municipal non poderá superar o déficit resultante do orzamento inicial no que se reflicta o financiamento previsto, no intre da concesión, ou o déficit final da actividade, no momento da xustificación.

CUARTA.- OBRIGAS DA INSTITUCIÓN

A Institución comprométese a:

- a) Someter a escola infantil da súa titularidade ao réxime establecido no regulamento de organización e funcionamento das escolas integrada na REIM cuxa aprobación definitiva publicouse no BOP número 72 do martes 15.04.2014
- b) O custo das prazas que se oferten na citada escola establecerase polo Concello, e dará dereito a 6 horas diarias de atención educativa e ao servizo de orientación aos menores, establecendo o Concello os diferentes tipos de tarifas, tanto por praza escolar como por servizos complementarios, someténdose ao mesmo réxime de admisión que as escolas de titularidade municipal.
- c) A escola infantil con carácter previo á percepción da subvención, achegará acordo de ter sometida a súa actividade ao regulamento de organización, funcionamento e réxime xurídico das escolas integrantes da REIM, regulamento que será de aplicación na súa integridade nos capítulos I al VI; en canto ao capítulo VII, as prazas ofertadas polo centro someteranse ao réxime económico contido no artigo 27 (determinación do custo das prazas e dos servizos complementarios polo Concello, determinación de tarifas xeral e



Área de Xustiza Social e Coidados Servizo de Educación

📁 236/2017/54 📄 23611I00B3

reducidas a aboar polos usuarios), excluíndose a aplicación dos artigos 28 en canto ao pagamento da achega municipal (aplicarase o previsto na normativa de subvencións), 29 relativo a empresas concesionarias e 30, referido a obras e mantemento de edificios de titularidade municipal.

- d) En ningún caso, o beneficiario poderá contratar servizos ou subministros con persoas ou entidades vinculadas co beneficiario, salvo que concorran as seguintes circunstancias:
- Que a contratación se realice consonte as condicións normais do mercado.
 - Que se obteña a previa autorización do órgano concedente do seguinte xeito:
 - i. Solicitude polo interesado con carácter previo á execución da actividade subvencionada.
 - ii. Acordo do órgano concedente, anterior á execución da actividade subvencionada, estipulando o terceiro/s co/s que se contratará e o/os servizos ou subministros que se recibe/n.
- e) Destinar os fondos achegados polo Concello da Coruña á finalidade contemplada, que se desenvolverá no exercicio 2017.
- f) Comunicar por escrito no prazo máximo dun mes dende a concesión da subvención calquera modificación dos datos identificativos do proxecto ou dos aspectos sustanciais do mesmo, para a súa aprobación.
- g) No mesmo prazo e forma comunicará, no seu caso, a obtención de outras subvencións, axudas, ingresos ou recursos para a mesma finalidade, procedentes de calquera outra Administración Pública, entes públicos ou privados, nacionais ou internacionais, que financien as actividades subvencionadas. Esta comunicación efectuarase, en todo caso, con anterioridade á xustificación da aplicación dada aos fondos percibidos.
- h) Presentar a xustificación no prazo de dous meses a partires da xustificación do convenio, mediante a documentación esixida nos artigos 30 e seguintes da LXS e no artigo 37 da ordenanza xeral de subvencións da Área de Benestar do propio concello.
- i) Conservar os documentos xustificativos da aplicación dos fondos percibidos, en tanto poidan ser obxecto das actuacións de comprobación e control, así como ao reintegro dos fondos percibidos nos supostos que proceda.
- j) En tódalas actividades organizadas directamente pola escola infantil e en todas aquelas outras xerais da Institución que garden relación co obxecto do presente convenio, incluírase ao Concello da Coruña como entidade patrocinadora.

QUINTA.- GASTOS SUBVENCIONABLES

Considéranse gastos subvencionábeis aqueles que de xeito indubidábel respondan a natureza das actividades subvencionadas e se realicen nos prazos establecidos neste convenio (xaneiro a decembro de 2017), tales como gastos de persoal



Área de Xustiza Social e Coidados Servizo de Educación

📁 236/2017/54 📄 23611I00B3

directamente afectado á actividade, gastos de profesionais, subministros e servizos efectuados polos provedores, etc... En todo caso, debe acreditarse no correspondente xustificante de gasto que o mesmo está directamente relacionado coa actividade.

Considerarase gasto realizado o que fose efectivamente pagado con anterioridade á finalización do período de xustificación.

Só serán subvencionábeis gastos correntes realizados no período de vixencia do convenio, incluíndo os efectuados con anterioridade á súa sinatura. Non serán subvencionábeis os gastos de investimento nin os de natureza inventariábel.

En ningún caso serán gastos subvencionables:

- Os intereses debedores das contas bancarias.
- Intereses, recargas e sancións administrativas e penais.
- Os gastos de procedementos xudiciais.
- Impostos indirectos cando son susceptibles de recuperación ou compensación nin os impostos persoais sobre a renda.

En ningún caso o custo de adquisición dos gastos subvencionábeis poderá ser superior ao valor de mercado.

En relación con gastos indirectos ou gastos xerais da entidade poderánse imputar á conta xustificativa gastos xerais da Institución até un 20% do orzamento da actividade presentado coa solicitude, ou do gasto executado se é menor, acreditando os mesmos cos correspondentes xustificantes de gasto e a acreditación do pago efectivo dos mesmos.

A entidade poderá optar por imputar como gastos xerais até un 10% do importe do gasto executado sen necesidade de presentar ningún xustificante. Neste caso non se poderá imputar na conta xustificativa ningún outro gasto de carácter xeral agás que se acredite nos xustificantes de gastos que se trata de un gasto directo e necesario para o desenvolvemento da actividade. En ningún caso caberá combinar ambas posibilidades.

Os gastos financeiros, os gastos de asesoría xurídica ou financeira, os gastos notariais e rexistrais e os gastos periciais non poderán ser considerados gastos indirectos, sendo subvencionables só no caso de que se traten de gastos directamente relacionados coa actividade subvencionada e sexan imprescindibles para a adecuada preparación ou execución da mesma.

Cando o importe do gasto subvencionábel supere as contías fixadas no real decreto lexislativo 3/2011, de 14 de novembro, polo que se aproba o texto refundido da lei de contratos do sector público para o contrato menor, o beneficiario terá que solicitar como mínimo tres ofertas de diferentes provedores, antes de contraer o compromiso para a prestación do servizo ou a entrega do ben.

A elección entre as ofertas presentadas, que deberán achegarse na xustificación, ou, no seu caso, na solicitude de subvención, realizarase conforme a criterios de eficiencia e economía, debendo xustificarse expresamente nunha memoria a elección cando non recaia na proposta económica máis vantaxosa.



Área de Xustiza Social e Coidados Servizo de Educación

📁 236/2017/54 📄 23611I00B3

SEXTA.- ABOAMENTO DA SUBVENCION

Con carácter xeral o aboamento da subvención realizarase trala presentación e aprobación da xustificación nos termos establecidos neste convenio.

Perderase o dereito ao cobro total ou parcial da subvención no suposto da falla de xustificación ou concurrencia dalgunha das causas previstas no artigo 37 da LXS, e cando non se acredite que estiveran cubertas ao menos 80 das 95 prazas ofertadas.

Tamén poderánse realizar pagos anticipados que suporán entregas de fondos con carácter previo á xustificación, coma financiación necesaria para levar a cabo as actividades obxecto da subvención. Neste caso, a Institución deberá solicitalo expresamente e constituirase unha garantía do 10% do importe total da subvención, que se realizará mediante a retención do pago polo Concello, ben no primeiro pago anticipado ou ben sobre varios até alcanzar esta contía. Presentada a xustificación e non existindo responsabilidade pola parte da Institución, devolverase a cantidade retida no concepto de garantía.

Non se poderá realizar o aboamento da subvención ao beneficiario en tanto que non se atope ao corrente no cumprimento das súas obrigas tributarias ou da Seguridade Social, ou sexa debedor por resolución de procedencia de reintegro.

SÉTIMA.- XUSTIFICACIÓN

Na xustificación deberá achegarse:

- A. Impreso de solicitude de xustificación segundo o modelo establecido.
- B. Memoria na que se acredite a realización da actividade e o grao de cumprimento dos obxectivos. O beneficiario deberá xustificar que realizou a actividade nos termos da memoria presentada.
- C. Balance de ingresos e gastos realizados con motivo da actividade subvencionada, de xeito que se poida comprobar que se axeitou ao orzamento inicial presentado.
- D. Relación clasificada co detalle dos gastos da actividade na que se indique o acredor, o número do documento, data de emisión, importe, concepto e data de pago.
- E. Para comprobar na medida na que se axustou o balance ao orzamento inicial presentado, acompañarase coa xustificación do cadro de desviacións do balance con respecto ao orzamento inicial, e, no caso de que se observen desviacións, cubrirase informe de xustificación.
- F. Neste senso, o importe da subvención está vinculado ao orzamento total da actividade e en ningún caso poderá ser superior ao déficit da mesma. No caso de que existan desviación á baixa entre o balance e o orzamento inicial presentado, deberá reintegrarse a achega municipal unicamente polo importe que supere o custo total das actividades subvencionadas.



Área de Xustiza Social e Coidados
Servizo de Educación

📁 236/2017/54 📄 23611I00B3

- G. Certificación do secretario, co visto e prace do presidente, das subvencións e outros ingresos que se xerasen co gallo das actividades subvencionadas con independencia do seu reflexo no balance.
- H. Facturas orixinais correspondentes aos gastos realizados no exercicio da actividade, que virán marcados cun selo no que se indique a xustificación para a subvención que foron presentadas e se o importe do xustificante se imputa total ou parcialmente á subvención consonte o disposto no artigo 73 do regulamento da LXS.
- I. As facturas haberán de presentarse polo conxunto da actividade subvencionada aínda que o outorgamento da subvención municipal sexa inferior ao orzamento inicial.
- J. Xustificarase preferentemente con facturas aínda que se poderán admitir outros documentos de igual valor probatorio no tráfico xurídico mercantil ou con eficacia administrativa.
- K. No caso dos gastos de persoal: nóminas, boletíns de cotización á Seguridade Social (TC/1 e TC/2) ou os que os substitúan regulamentariamente e documentos de ingreso en Facenda das retencións do I.R.P.F. No caso de que a subvención outorgada teña como destino o pagamento de premios ou axudas de custo, a entidade beneficiaria ven obrigada á retención do I.R.P.F., nos límites e excepcións que establecen a lei e o regulamento do imposto ou no seu caso as disposicións regulamentarias en vigor.
- L. Acreditamento do pago efectivo de cada un dos gastos. Só se considera gasto realizado o que foi efectivamente pagado con anterioridade á finalización do período de xustificación, debendo acreditarse o aboamento coa copia do extracto bancario cando se realice por transferencia, copia do cheque e o seu correspondente cargo no banco cando se realice por cheque, e coa conformidade, acreditada abondo, do contratista ou provedor na correspondente factura de pagos en efectivo.
- M. Admitiranse pagos en efectivo por importes de até 500,00€. No caso de que o pago dun servizo estea fraccionado en varios aboamentos, o límite de 500,00€ entenderase para o conxunto dos pagos correspondentes a ese servizo. Tamén se considerará efectivamente pagado o gasto: coa cesión do crédito do dereito de cobro da subvención a favor dos acredores por razón do gasto realizado, ou coa entrega aos mesmos dun efecto mercantil garantido por unha entidade financeira ou compañía de seguros.
- N. Certificado do secretario da entidade, co visto e prace do presidente, no que se desagregue, por tipo de gasto, o importe total dos gastos xerais da Institución, no caso de que se imputen gastos xerais ou indirectos a unha actividade concreta.



Área de Xustiza Social e Coidados Servizo de Educación

📁 236/2017/54 📄 23611I00B3

O Concello reservase o dereito a comprobar, polos medios que estime oportunos, que a xustificación é correcta. Polo tanto, o beneficiario quedará obrigado a facilitar canta información lle sexa requirida polo servizo xestor, a Intervención Xeral e os órganos competentes na censura das contas.

OITAVA.- REINTEGRO DE CANTIDADES

Procederá o reintegro das cantidades percibidas e a esixencia do xuro de demora correspondente dende o momento do pago da subvención até a data na que se acorde a procedencia do reintegro.

NOVENA.- OBRIGATORIEDADE DO CONVENIO

As partes asinantes declaran de obrigado cumprimento todo o consignado no presente convenio e manifestan que o seu incumprimento, por calquera das partes, dará lugar á rescisión deste.

DÉCIMA.- CARÁCTER DO CONVENIO

O presente convenio ten carácter administrativo e rexerase pola normativa municipal e polo establecido na lexislación vixente na materia. Non leva consigo relación laboral de ningunha natureza entre o concello e a entidade participante neste nin co persoal contratado pola Institución.

Non cabe renuncia nin delegación de competencias que legalmente lle corresponden ao Concello á marxe das canles legais, non existindo posibilidade de transferir competencias que impliquen exercicio de autoridade a entidades privadas.

DÉCIMO PRIMEIRA.- DATOS DE CARÁCTER PERSOAL

Os datos de carácter persoal solicitados para a realización das actividades deste convenio obxecto de tratamento só poderán ser comunicados a un terceiro para o cumprimento de fins directamente relacionados coas funcións lexítimas do cedente e do cesionario co previo consentimento do interesado tal como establece o artigo 11.1 da Lei orgánica 15/1999, do 13 de decembro, de protección de datos de carácter persoal.

DÉCIMO SEGUNDA.- INTERPRETACIÓN DO CONVENIO

O Concello resérvase a facultade de interpretar o presente convenio e resolver as cuestións que puidesen xurdir acerca do seu cumprimento ou incumprimento á vista do correspondente informe da comisión de seguimento.

DÉCIMO TERCEIRA.-DURACIÓN

O prazo de duración deste convenio entre o Concello e a Institución é improrrogable e establécese desde o 1 de xaneiro até o 31 de decembro de 2017.



Área de Xustiza Social e Coidados
Servizo de Educación

📁 236/2017/54 📄 23611I00B3

En proba de conformidade, asínase este convenio, en exemplar duplicado, no lugar e na data que se indican a seguir.

A Coruña,

O Alcalde

O presidente da Institución Benéfico
Social Padre Rubinos

D. Xulio Ferreiro Baamonde

D. Eduardo Aceña García